

التيوتوكيات

عجينة البشرية

كلام التيوتوكيات من أروع الكلام اللي بيوصف العذرا مريم و يشرح بدقة التجسد و طبيعة السيد المسيح
تعالوا ناخذ مثال للقب (عجينة البشرية) اللي نقوله في تيوتوكية يوم الخميس



المصدر: كتاب 'مريم العذراء في العقيدة' - أبونا سيداروس عبد المسيح

كلام التيوتوكية

تيوتوكية يوم الخميس متقسمة ل 9 قطع ... و القرار بتاعها: "لم يزل إلهاً: أتى وصار ابن بشر: لكنه هو الإله الحقيقي: أتى وخلصنا"
القطعة رقم 6 فيها رُبع لازم نتوقف عنده:

كل عجينة البشرية: أعطتها بالكمال: لله الخالق: وكلمة الآب

— القطعة #6 من تيوتوكية الخميس

روعة الكلام

و إحنا بنقول الرُبع ده، شوفوا إحنا بنقول كام حقيقة إيمانية

- **الأول vs. الثاني:** الربع اللي قبله بيقول إن حواء الأولى أُخِذت من ضلع آدم الأول ... أما آدم الثاني (ربنا يسوع) فأخذ ناسوته من حواء الجديدة (العذرا مريم)
- **طبيعة البشرية كلها:** آباء الكنيسة القديسين اعتبروا إن البشرية كلها - نسل آدم و حواء - طبيعة واحدة و عجينة واحدة ... و ربنا اختار جزء من العجينة دي يتحد بيها (العذرا مريم) .. و بكده يكون اتحد بالبشرية كلها و كلمة عجينة زي كلمة خميرة ... و الخميرة أو العجينة الصغيرة تتمثل العجين كله و تحمل كل صفاته ... و تقدر تخقر عجين تاني

ألستم تعلمون أن خميرة صغيرة تخمر العجين كله؟

— كورنثوس الأولى 5 : 6

- **ابن الإنسان:** عشان كده أحد أهم ألقاب ربنا يسوع هو (ابن الإنسان) ... أنه ابن للإنسانية كلها (الطبيعة البشرية) ... و طبعاً ربنا ركز على اللقب ده عشان يبين إنه مش إنسان عادي (و إلا لو كان إنسان عادي, ليه يركز إنه ابن الإنسان؟) ... المعنى إن ربنا يسوع لم يكن إنساناً بل صار إنساناً في بطن العذرا مريم (الكلمة صار جسداً)
- **ليست إناء:** طبعاً ده بيوضح لنا إن الفكر الغريب اللي دخل على الكنيسة و بيوصف العذرا كإناء فقط ده فكر خاطئ تماماً! و بيبعد الإنسان خالص عن بركات التجسد و الفداء فكر آباء كنيستنا المستقيم إن العذر قدّمت - كعجينة للبشرية - من لحمها و دمها جسد للاتحاد باللاهوت ... ربنا يسوع أخذ جسدنا و صار واحد فينا

فإذ قد تشارك الأولاد في اللحم والدم اشترك هو أيضا كذلك فيهما, لكي يبيد بالموت ذاك الذي له سلطان الموت, أي إبليس

— عبرانيين 2 : 14

- **أخذ الذي لنا:** عشان ربنا يقدر يرد الإنسان الساقط في الخطية إلى رتبته الأولى ... و يعتقه من سلطان الخطية و الموت و الشيطان ... كان لازم ياخذ ما للبشرية (صورة الترابي) ليعطيها ما للروح (صورة السماوي) ... عشان كده أخذ العجينة البشرية كلها فيه (من خلال العذرا مريم)
- **صلبنا معه:** التفكير إن العذرا عجينة البشرية يفهمنا إزاي القديس بولس الرسول (و كل واحد فينا) يقدر يقول:

مع المسيح صلبت, فأحيا لا أنا, بل المسيح يحيا في

— غلاطية 2 : 20

ربنا يدّينا نسبّح بالروح و الذهن و القلب ... نفهم عظمة ألحان كنيستنا اللي بتوصل لنا العقيدة و الإيمان الصحيح بطريقة بسيطة و رائعة و ألفاظ دقيقة جداً